

欽定剿平粵匪方略

欽定勦平粵匪方略卷二百六十四 辛酉年

四月二十五日 癸未 瑞昌王有齡奏言據李定太

及衢州道府稟報三月二十四日華埠之賊由
北路進犯常山另有大股由七都球西路而來
復分股繞至常山南路包抄我軍之後副將郭
啟舉分兵截擊斃賊數十名無如衆寡不敵各
營相繼潰散賊卽由北門爬城而入縣城當卽

失守其防守江山之安定軍五百名前調赴常
山援勦江防益形空虛該縣知縣崔棻以距城
二十五里之大陳地方爲自常至江要道於二
十五日親詣該處集團堵禦行至中途賊匪大
股已由常山而來擁至西山一帶分路竄進縣
城該縣趕救不及暫駐大溪灘激勸民團再圖
攻復是日華埠之賊又竄擾開化馬金嶺等處

常山之賊分股來撲衢州約十餘萬人帶有木
梯圖攻郡城李定太於二十六日三更時親督
遊擊禧祿等潛出東門並知會水師礮船以爲
援應道員江允康等調集民團上城以壯聲勢
禧祿等繞至山後驟開槍礮該逆猝不及備擊
斃甚多適總兵崇志帶兵趕到昏黑之中不辨
我軍多少賊衆紛紛驚竄其雙港口以上之賊

先驅參將賴廷芳等迎勦該逆蒼黃抗拒亦卽
敗潰我軍併隊逐北十餘里殺斃賊匪一百五
六十人落水淹死者無算該逆退至航埠等情
查江常二縣上年十二月間被僞忠王李秀城
竄踞浙省大費兵力始得克復總兵曾玉明副
將林文察旋即回閩援剿聲勢益孤侍逆遂以
十萬之衆乘虛窺竄不數日而復陷江常進僞

衢城該郡文武雖能固守難保大股不併力再犯且江常小路北達龍游南通遂昌儻仍蹈八年故轍金處俱屬可危真有防不勝防之慮臣等當卽飛咨張玉良親統大軍赴衢勦辦兼顧龍游壽昌一面截留參將周璧等所帶潮勇四百名守備歐陽斌所帶閩兵六百名飭調遊擊王浮龍所帶奮武軍一千名馳赴衢州蘭谿一

帶聽候張玉良調遣旋准張玉良咨稱已派副將況文榜帶兵勇九百名都司李光帶礮船七隻於二十六日水陸援衢其派往於潛昌化之副將陳步高參將羅大春兩軍已先後調回陳步高卽於二十八日抵嚴接辦防務該提督卽日起程由龍游取道督率諸軍相機迎勦惟於昌二縣我軍已撤賊尙負嵎時出沒於獨松關

等處長安之賊雖未深入而嘉興全屬淪陷石
門乍浦克復無期朝發可以夕至省城面面受
敵危急殆難言狀所冀曾國藩左宗棠等迅將
徽饒肅清俾臣等專辦浙西之賊大局庶有轉
機奏入

上命軍機大臣傳諭瑞昌王有齡曰浙江嘉興等郡邑
久未克復皖南賊匪復陷江山常山進逼衢州儻令

紛竄金處勢將通省糜爛著瑞昌王有齡飭令道員
江允康等實力防守衢州府城一面飛飭張玉良親
統官軍星夜前進速解衢州之圍卽將江山常山兩
城設法收復其金華處州兩府屬要隘並飭各地方
文武認真防堵毋令匪蹤闖入賊匪久踞乍浦勢必
由海甯窺伺省城根本重地豈堪震動現在曾秉忠
等扼紮洙涇新埭等處卽著瑞昌王有齡飭令該提

督相機進剿並將海鹽平湖乍浦等處迅圖克復

上又命軍機大臣傳諭慶端瑞璜曰瑞昌等奏婺源賊匪竄擾浙境三月二十四日常山失守二十五日江山失守分股攻撲衢州府城等語浙江乍浦失守後杭紹岌岌可危逆匪因總兵曾玉明等同閩援剿乘虛復陷常山江山雖經該將軍等派張玉良赴衢剿辦而浙省面而受敵實有力難兼顧之勢閩省地屬

鄰封赴援較近著慶端瑞瓊體察情形如汀州一帶
軍務稍鬆卽抽調勁旅派委得力大員統帶由政和
浦城等處前往衢州一路會同浙軍實力剿辦所需
糧餉並著寬爲籌備以利進行

瑞昌王有齡又奏言查三月初八日賊由新豐
鍾埭回犯平湖已革總兵米興朝及副將黃金
友平湖縣知縣汪元祥分投截剿賊已敗退嗣

准乍浦副都統錫齡阿來報是日未刻海鹽縣城復陷餘勇退至乍浦海塘並衝回海甯一帶當經錫齡阿派弁攔截飭令遊擊楊玉成守備楊應龍劉定暫紮乍浦城外初九日米興朝率隊趕赴乍浦會籌防剿甫抵該處賊已由海塘來撲錫齡阿親赴西門登陴督守米興朝率隊出南門迎剿並派劉定前赴瓦山協同守備董

洪祥併力抵擊詎該逆另股數千潛由南路海
灘包抄我後董洪祥衝入賊隊旋即陣亡米興
朝卽令各隊殺回東門尙冀整軍入城守禦及
抵東路城圍賊已大股竄至四面火起知乍城
業經失陷時平湖又報賊至米興朝卽督同已
革遊擊熊建猷等衝出重圍回救平湖行至半
途據探初九日新豐鍾埭之賊復犯平防經黃

金友等各率所部分路迎擊斃賊四五百名無
如乍浦之賊已由西塘橋來犯南路又復喫重
平湖遂致不守米興朝阻截平乍之間勢難飛
越入浙不得已暫撤平湖之防乘夜退至洙涇
楊玉成等先後抵洙遊擊黃金祥渡海回浙米
興朝會商曾秉忠將各軍暫紮金山衛以固浦
東門戶爲攻復平乍地步先是曾秉忠聞平乍

之警飭令遊擊曾敏行知縣洪士鏡督率礮船
赴援平湖及平城已陷當與黃金友礮船同駐
新隸防賊下竄十一日賊果竄至新隸之大通
橋黃金友等將礮船排列轟斃賊匪無數正欲
乘勝衝入不意海鹽乍浦賊衆來援將我軍四
面圍困洪士鏡力戰陣亡適曾秉忠督軍馳至
新隸接應始將該逆擊敗黃金友收隊回赴洙

經新墟分扼嚴防又據海甯州知州稟報乍浦失守時錫齡阿在西門城上禦賊被害等語其爲力竭捐軀已無疑義應請

飭部將乍浦副都統錫齡阿及守備董洪祥一併從優議卹管帶長龍礮船之知縣洪士鏡被困陣亡應請

旨照五品陣亡例議卹至米興朝因赴援乍浦不能兼

顧平湖黃金友以賊衆兵單全師而出復奮力
進攻尙非畏蕙退縮者可比查克復海鹽案內
經臣等奏請開復米興朝原官

賞給黃金友總兵銜今旣失守城池請將該員等保案
撤銷一面責令會同洙涇各軍攻復平乍以觀
後效遊擊楊玉成田宗興等業請革職其自海
鹽潰退之遊擊黃金祥守備楊應龍千總盧應

元應一併革職留營效力贖罪奏入

上諭內閣曰前因乍浦等處失守屢諭瑞昌王有齡將錫齡阿米興朝等下落查奏茲據奏稱三月初九日賊竄乍浦副都統錫齡阿登陴督陣已革總兵米興朝率隊出南門迎勦旋因賊匪過多守備董洪祥衝入賊隊旋即陣亡米興朝欲由東路殺回適乍城已陷該革員退往平湖復因賊衆撲至退至洙涇副將

黃金友於平湖失守後同知縣洪士鏡等督兵往剿
因賊匪來撲洪士鏡力戰陣亡黃金友收隊回赴涿
涇新隸並據探稱錫齡阿於城上禦賊被害等語除
知縣洪士鏡業已降旨議卹外乍浦副都統錫齡阿
登城守禦力竭捐軀殊堪憫惻著交部從優議卹守
備董洪祥著一併從優議卹已革總兵米興朝赴援
不力罪無可追著發往軍臺效力贖罪仍暫緩起解

留營效力儘再不知愧奮卽著從重懲辦副將黃金
友進攻平湖敗退亦有應得之咎著卽革職留營效
力其前次克復海鹽瑞昌等將該革員等保奏之案
著卽撤銷遊擊黃金祥守備楊應龍千總盧應元著
一併革職留營效力贖罪

二十六日

甲申

毓科奏言僞忠王李秀城由華埠

於上年十一月閒竄入玉山之七都球等處擾

及古城地方適道員彭斯舉帶兵由浙回援入
城協守十二月初二日該逆大股約二萬餘人
圍攻東西北三門道員王德榜督勇數百人出
城衝殺斃匪多名該逆敗退初三日復攻東西
兩門我軍堅守不出午後雨雪交加諗知賊疲
冒雪出擊賊勢少挫退至五里洋等處王德榜
等是夜率勇出北門潛至十七都泥弄岡都司

顧雲彩率勇出東門潛至東津橋各勇行近賊
巢該逆不知虛實紛紛亂竄官軍乘勢焚其巢
壘餘逆逃往古城橋村江常大路而去初六日
我軍分道追至距古城二三里見有紅衣賊目
登高督戰哨官何秀清自山後小路抄出將逆
首擊斃逆衆大潰殺賊六七百名追至屏風關
外生擒數十名王德榜於初七日親督各營分

馳橋村屏風關等處將賊壘一齊踏破該逆被
勦退踞江常等處本年正月初三日悉數竄入
玉山縣屬東津橋十七都一帶馬賊數百人直
撲東門當被我軍擊退次日進逼三里街意圖
圍城東津橋五里洋等處均被賊踞王德榜顧
雲彩會合平江各營迎擊於七里街自午至酉
鏖戰四時當將七里街三里街之賊擊退計前

後殪賊六百餘名初六日賊忽由東津橋等處繞至南門外通廣豐之大路口一面攻城牽掣我軍初八日王德榜等分隊出城殲剿該逆悉向八都一帶逃去城圍遂解詎該逆先於初六日分股竄撲廣豐縣城環攻東北西三門道員段起登陴守禦守備段華等手燃大礮斃賊目四名持梯賊二十餘名賊勢少卻初七日賊復

偏近北門並於對城高山趕紮賊營三座東西
南等門環攻甚急段起等分門抵禦斃匪多名
燒燬東南門外賊館十餘座該逆由三官殿翁
家嶺退竄西北門外匪踞如故初九日四更時
選敢死士潛至北門燒破賊營二座該逆遂棄
壘奔逃廣豐解圍先是信防道員屈蟠署廣信
府知府鍾世楨以玉山七里街攻克後逆勢南

趨慮其窺伺廣豐曾囑王德榜等率隊由大南
橋應援並派水師礮船於初十日同往行至距
郡城十八里之和尙渡見該逆在江口門搭造
浮橋遙擁而進都司危廷貴等衝鋒迎擊槍傷
賊目一名各軍奮勇直前殺賊多名探得該逆
後隊尙在距郡二十里之阜頭地方打館十一
日繞出丁公橋暗襲郡城廣豐續至之賊復由

阜頭直偪水南距廣信府城五里許屈蟠親自
出隊迎敵該逆愈聚愈衆將郡城合圍並在西
關外築造牆卡約有五六萬之衆逆酋李秀城
親在山岡指揮四面猛攻經鍾世楨等會同屈
蟠督兵固守又派外委詹鴻恩督帶礮船沿河
轟擊護住石卡浮橋兩處十二日逆酋李秀城
攻城愈急適知府郭式源督隊馳援道員段起

亦率所部從廣豐前來乘勢夾擊該逆猝不及防溺死及殲斃者無算餘賊墮水而逸鍾世楨等見東北兩門城圍已解惟西門外之賊死拒不退當知會段起由水南抄賊之右郭式源等從北門出抄賊之左遊擊劉勝祥從西門外正街直衝而進逆衆登時奔潰悉竄葉青洲一帶而去郡城之圍遂解斬獲約千餘名生擒百餘

名查粵匪以全力復犯玉山轉圍廣豐竄撲郡城志在踞守要津以通徽浙之氣經該文武員弁同心勦力克保二城厥功甚偉在事尤爲出力各員謹先行開列懇

恩獎勵陣亡都司危廷貴等禦賊殞命殊堪憫惻應請飭部分別議卹奏入

上諭內閣曰上年十二月閒逆目李秀城竄入江西玉

山縣糾衆圍城我軍出城焚其巢壘擊斃六七百名
追至屏風關外正月初三日該逆復由浙江竄至玉
山撲城經道員王德榜等率隊迎擊殺賊六百餘名
該逆悉數逃竄城圍遂解其圍攻廣豐之賊經官軍
擊斃數百名乘勢燒燬東南門外賊館十餘座北門
外賊營二座逆衆棄壘逃奔廣豐城圍立解玉山敗
逆繞襲廣信府城署知府鍾世楨等帶隊攻勦殲斃

賊匪千餘名生擒一百餘名城圍盡解勦辦尙屬迅速尤爲出力之候選道屈蟠王德榜均著賞加按察使銜都司顧雲彩著以參將卽補並賞加副將銜卽用道段起著賞加布政使銜知府郭式源著留於江西以道員補用署廣信府知府鍾世楨著以道員遇缺儘先補用仍留廣信府本任知縣章激著以直隸州知州同知補用並賞加運同銜縣丞周宗頤著以

知縣補用丁憂知縣黃應輔著俟服闋後仍留江西
免補本班以直隸州知州同知補用同知張時華著
以知府升用先換頂戴守備段華燮鰲均著以都司
補用並賞加遊擊銜陣亡都司危廷貴守備王富甲
知縣胡德璜均著交部從優議卹外委張文光趙行
彩李克勤把總賀經綸喻團博外委何德喜喻武階
馬福玉均著交部照例議卹其餘出力官紳弁勇並

陣亡各員著毓科查明分別奏請獎卹

毓科又奏言樂安崇仁逆匪分爲兩股一由樂

安之龔坊竄入永豐地界吉安戒嚴一由宜黃

之劉家渡竄入豐城地界省城戒嚴臣卽督同

司道趕備城守事宜一面嚴檄知府郭式源等

督帶平江等營分投追擊並派水師參將孫昌

國嚴扼省河副將李金暘駐守吉安道員劉于

淳亦恐賊薄省垣分軍追剿以分賊勢詎豐城
之賊偵知省垣無隙可乘於二月二十六日竄
至樟樹鎮樂安之賊於二十五日竄入新淦縣
城失守該縣知縣李輔自失守後趕至西鄉調
集練勇數千一面會商內河水師協力圍攻殺
賊數百人卽於三月初二日將新淦縣城收復
該賊掠得民船用木簕竹筏於初十日在吉水

之煤灘地方紛紛渡河西岸官軍迎擊失利吉
安府知府曾詠等商令李金暘親往督陣遇賊
於龍王廟全軍潰散退保安福曾詠見外援盡
絕勢已垂危飭令署廬陵縣知縣丁日昌紮住
螺子山並號召鄉團以助聲勢自率經歷劉建
勳等登陴守禦十一日賊果圍至撲城用火箭
射入城中登時火起悍賊蟻附上城曾詠等知

事不可爲率勇衝出吉安遂陷途遇丁日昌督
同紳士曾金榜等調集鄉勇萬餘人於十三日
進攻奎華門一面飭令兵勇點放地雷該逆猝
不及防轟斃無算城賊紛紛竄出官軍沿途追
殺斃賊百餘名生擒賊目二十九名該逆由吉
水一帶下竄當將吉安府城收復此次新淦吉
安相繼淪陷不特本省全局搖動卽湖南邊界

亦被震驚現在賊蹤旣由吉水下竄顯係窺伺
瑞袁臨等府完善之區當飭各軍分堵要隘一
面檄調道員劉嶽昭一軍由楚來江藉資策應
至吉安新淦各城失守雖經該地方官等號召
鄉團迅就克復惟功過究難相抵相應請

旨將吉安府知府曾詠署廬陵縣知縣丁日昌代理新
淦縣知縣李輔一併革職以示懲儆其餘同城

文武員弁及傷亡弁勇查明另行辦理奏入

上諭內閣曰本年二月間江西逆匪竄陷新淦縣城該縣知縣李輔會合紳團於三月初二日將縣城收復逆匪復竄吉安府城經該府知府曾詠等督團進剿該逆於十三日由吉水一帶下竄當將府城收復各該員於城池被陷後雖能迅圖攻克惟未能先事豫防致令地方失守實屬咎有應得吉安府知府曾詠

署廬陵縣知縣丁日昌代理新淦縣知縣李輔均著
革職以示懲儆其餘同城文武員弁及傷亡弁勇著
該撫查明分別辦理

毓科又奏言僞忠王李秀城大股撲犯廣信被
創後奔竄鉛山弋陽貴溪屬境正月十九日竄
至金谿之孔坊臣飭道員劉于瀍分軍迎剿並
令知府郭式源丁峻率勇追擊大獲勝仗二十

一日該逆竄至距建昌府城三十里之渭水橋
其時都司李昇平等軍在萬年橋沿河守禦見
賊頭隊數百直抵河東開礮轟擊賊勢少卻二
十二日該逆力攻萬年橋我軍力堵橋口斃匪
百餘名是晚賊在萬年橋下游架搭浮橋蟻附
而渡我軍恐守垛兵單卽將各隊全撤入城登
陴守禦二十三日該逆直逼城下先撲北門經

千總楊錫斌等擊退同時攻撲東西南三門之賊亦經參將富安把總連美都司李昇平守備常安等軍分投擊敗該逆盤踞河東一帶以爲巢穴藉浮橋以通往來復於四門築壘二十餘座以避礮火並斷我軍出隊之路二十七日該逆率領大隊環攻四門各架雲梯紛紛登堞我軍施放噴筒火罐斃賊無數二十八九等日該

逆百計猛攻我軍多方守禦二月初開城中米糧垂盡鉛藥無多人心頗爲惶急初七八等日該逆潛在南門挖成地道兩處因天雨未發我軍偵知趕於城內加築子城一道密爲防範初九日卯刻月城內地道轟裂三丈有餘南門右邊亦同時轟塌四丈有餘該逆大隊冒煙衝突各軍因事在危急爭先堵禦斃賊四五百名賊

始退去當將塌口立時修補是日午刻黃鳴珂以河東水勢驟漲將該逆浮橋衝斷南路之賊不能接應擬先攻河東巢穴當派知縣朱爾輔等帶領各勇由東門出隊分路包抄殺賊數百名攻破賊營三座當將河東收復我軍卽駐賊營堵住東路該逆自遭懲創連日攻城不復如前兇悍黃鳴珂等知賊技已窮於十三日各派

六成隊分門出勦賊陣大亂棄械狂奔當將四
門賊壘礮臺一律平毀南豐等縣紳士中書吳
嘉賓等帶勇會合窮追共斃賊一千餘名賊由
北路而遁我軍追至距城二十五里之姑橋地
方始行收隊建昌解圍該逆復圖襲取撫州劉
于瀄與署撫州府知府鍾峻等當卽檄調援建
水師回救本郡一面趕辦城守事宜並令副將

蔡康業督勇駐紮西門外七里岡丁峻督勇駐
紮東門外河東灣互相犄角水師均泊文昌橋
以上用備截擊布置初定十二日賊果大至丁
峻等率隊衝鋒斃賊數十名其時賊在城外沿
河蟻聚適遊擊萬立松管帶礮船四十餘號由
建回援一路排礮轟擊斃賊極多賊始退踞上
頓渡地方十三日丁峻等督率全隊由鍾家嶺

一路進剿賊自退上頓渡後銳氣已挫見官軍
踵至紛紛驚潰我軍追至東館地方而還該逆
復在許家灣搭造浮橋圖擾金谿適郭式源由
河口鎮行抵撫州會合水陸各軍連日進剿獲
勝該逆無從駐足十七日潛由龍骨渡分竄宜
黃一帶而去撫郡解嚴此次李秀城竄擾江西
欲得撫建進圖省會各該文武官紳等竭力防

集賢堂
勦轉危爲安均屬著有微勞尤爲出力各員謹
先行開列籲懇

恩施其餘守城援勦出力各官紳弁勇可否查明請獎
出自

鴻慈陣亡之都司楊正剛等效命疆場殊堪憫惻應請
飭部從優議卹以慰忠魂奏入

上諭內閣曰逆賊圍攻江西建昌撫州等城在事文武

官紳等均能竭力防勦轉危爲安自應量予獎敘江西署建昌府知府黃鳴珂著以知府遇缺卽補並賞加道銜賞換花翎參將富安著以副將補用並賞換花翎遊擊李昇平著免補遊擊以參將仍留江西補用並賞加副將銜降補都司常安著開復都司以遊擊留於江西補用並賞戴藍翎把總連美著以守備留於江西補用並賞換花翎升用同知朱爾輔著遇

缺卽補並賞換花翎知縣劉世偉著賞加運同銜並
賞戴藍翎建昌府經歷成崑山著開缺以知縣遇缺
卽補並賞加同知銜縣丞喻燾著免選本班以知縣
卽選並賞加五品銜府經歷何資深著以知縣留於
江西補用並賞加同知銜賞戴藍翎知府黃家駒著
賞加鹽運使銜並賞換花翎知府王錫齡著遇缺卽
選並賞加道銜把總胡迪堂施從善均著以守備用

並賞戴藍翎遊擊萬立松著賞加副將銜甘肅安肅
道劉于瀉署撫州府知府鍾峻都司定凱均著交部
從優議敘其餘出力官紳弁勇著毓科擇尤保奏陣
亡都司楊正剛守備陳志勝戴吉順千總李興張得
興把總黃賢文何勝發陳新勝王永興姚玉勝黃康
懷外委沈繼學楊正東龍有德龍作達蔡洪貴傳陶
起賀金勝黃廣標夏倫福余國清從九品銜鍾能均

著從優議卹

欽定剿平粵匪方略卷二百六十五

辛酉年

五月初二日

己丑

瑞昌王有齡奏言婺源賊匪竄

踞常山江山二縣每日分赴各鄉擄糧並未他竄惟華埠地方逆黨陸續麕至三月二十四五等日竄入開化馬金街二十九日竄至遂安民團抵敵不住三十日遂由東亭直抵淳安之港口副將余永椿督兵迎剿戰守兩日勢不能支

余永椿髀骨受傷遇救得生卽在茶園暫紮四月初二日復退守桐關賊匪追至早禾埕聲言欲竄嚴州初三日由商家源富德源兩路分竄壽昌縣城失守旋至青田畈等處登旗開礮直撲小番嶺下該處爲壽昌蘭谿交界知府程兆綸等先派紳士祝怡瑞統帶安勝兩軍前往會同民團扼要守禦追賊竄至接戰逾時斃賊數

十名生擒三名賊始漸退我軍卽據山爲營初
四日壽昌之賊又分股竄至大同鎮其地通龍
游之梅嶺蘭谿之界址嶺賊以小番嶺守禦嚴
密意欲由此兩路掩襲我軍之後甚爲危急是
時張玉良統領大隊已抵衢州方欲進攻江山
未及回顧嚴州祇有副將陳步高一軍二千七
百人蘭谿並無防兵惟賴民團自行保衛臣等

不得已飛咨張玉良先防賊匪內竄一面調副將貴廷芳礮船駛赴嚴州江面遊擊賀秉鈞黃忠二起礮船駐泊龍游蘭谿江面以防偷渡並令參將周璧等所帶兵勇暫留嚴州會剿旋准張玉良咨會已於初五日親統各軍馳回洋尾埠一帶力扼下游因思該逆並不直竄嚴州而旁犯蘭谿其爲垂涎金紹完善之區已可概見

所幸張玉良援應迅速蘭谿民團累著成效緩
急可恃當不得逞其逆謀而江常踞逆伏而未
動或由常山龍游兩路夾擊衢城或由江山分
竄處州之遂昌龍泉等縣均未可定已令處州
文武各員會商嚴防其開化遂安縣城是否失
守並壽昌城中文武各員下落俱俟查明具奏
奏八

上命軍機大臣傳諭瑞昌王有齡曰江山常山賊匪踰
伏未動華埠之賊復竄陷壽昌縣城其由蘭谿竄擾
金華固屬可虞而由壽昌以至紹興杭州均屬一水
可通匪蹤尤易闖入是此時派員堵剿惟嚴州最爲
緊要該處僅有陳步高一軍合之該將軍等派往之
貴廷芳等礮船兵力殊屬未厚據稱張玉良行抵衢
州聞警回援已至洋尾埠一帶力扼下游該提督屢

挫之餘是否足恃且由衢州折回已成尾追之勢亟應由省調撥重兵迎頭扼截著瑞昌王有齡悉心籌酌如令提督饒廷選前往嚴州一帶將防剿事宜督率辦理與張玉良一軍互相聯絡更爲妥善該匪旁犯蘭谿意在窺伺金華紹興卽著飭令張玉良嚴密堵截以保完善江常踞匪可以夾攻衢州並可分擾處州之遂昌龍泉等縣著瑞昌等嚴飭該處文武各

員實力防範不可疏失

上諭內閣曰安徽婺源逆匪竄至華埠分股由開化遂安竄入淳安之港口副將余永椿督兵迎勦受傷退守桐關賊匪竄陷壽昌縣城著瑞昌等迅飭帶兵各員力圖克復毋任久踞開化遂安縣城是否失守並壽昌各城文武下落著瑞昌等查明具奏副將余永椿節節退守受傷各情有無捏飾並著查明從嚴叅

辦

瑞昌王有齡又奏言三月初三初六等日甯國賊匪千餘人欲竄孝豐該縣知縣張增文督團抵禦斃賊百餘名賊即敗遁追至甯國縣城外始行收隊安吉縣知縣周冕正擬約會長興孝豐三邑民團攻取廣德忽廣德施家井之賊於十二日竄至該縣姚圩地方周冕調集團勇於

十六日在姚垌接仗三戰三勝將該逆追出施
家井焚去賊卡一座二十一日於潛股匪由餘
杭之黃湖竄至武康之箬嶺關該縣知縣張定
魁率領槍手團勇向前截擊立將該逆馬隊衝
散殺斃數十人賊遂竄往獨松關而去二十三
日烏鎮之賊糾集四千餘人分作三股直竄雙
林駐防該處之水陸各軍奮勇迎敵被賊包抄

幾爲所挫道員趙景賢聞信派遊擊李楚材帶領兵勇礮船會合民團奮勇前進賊已越入西高橋卡放火我軍四面兜擊將西高橋卡奪回賊卽竄往萬奎橋復經兵團水陸並進斃賊三百餘名奪獲賊船十隻賊遂遁回烏鎮老巢二十六日震澤之賊竄近南潯經官軍出擊賊知有備遂由下橫煽北竄至橋澳民團會集奮擊

又經官軍半路截殺奪獲賊船十五隻殺賊三百餘名淹斃尤衆賊卽遁回平望太湖東西兩山自被竄擾未經收復時有逆匪出沒三月二十日賊船大小八十餘隻蠶擁而來經紳士沈平章督率礮船會同夾浦防軍出湖轟擊該逆竄向東北而去陸賊復由香山嶺來犯夾浦我軍會合民團馳往迎勦賊仍回竄烏溪至石門

之賊數至德清等處窺伺新市亦經民團擊退
查湖州各屬環偏逆氛幾有刻不能安之勢賴
官軍民團齊心痛勦往往化險爲平惟近探於
潛臨安甯國廣德之賊同時圍擾孝豐長興縣
境深恐民團不能抵禦現飭趙景賢派隊馳援
協同堵禦

同日慶端瑞瓚奏言汀州逆匪大半聚於連城

逆首童容海等糾率大股悍賊竄至連城之姑
田鄉逼近永安並欲分股由清流下竄意圖兩
路並犯延平軍情甚爲危急前飭總兵曾玉明
暫革道員張啟煊由永安清流進兵所部皆不
滿二千實形單薄臣等通籌局勢此時浙省兵
力較厚杭衢防務稍鬆不得已將分防杭衢之
遊擊吳青華等所帶兵勇二千名飛調回閩並

飭守備黃大雄等帶勇一千一百名馳赴永安
歸曾玉明調遣迎頭截勦直擣姑田又派遊擊
劉紹基帶兵五百名急趨清流歸張啟煊調遣
進攻連城前後夾擊並令遊擊許忠標率所部
進攻武平使該逆首尾不能相顧一面分咨護
理水師提督蔡潤澤添募壯勇八百名與前調
兵勇一千二百名分隊赴延護理陸路提督石

棟派員募勇馳赴龍巖以爲後路策應三月十六日曾玉明派都司楊三益等帶勇馳赴姑田誘賊出戰該逆率衆二千餘人出撲楊三益等佯敗誘賊至鴨公腰地方林文察督帶臺勇斃勒斃賊數十名曾玉明派隊繼進鏖戰四時斃賊甚多該逆大敗竄回武平踞逆經署汀州中營遊擊許忠標等攻剿疊有斬獲三月初十日

四更時賊分兩股偷襲許忠標營盤許忠標等率隊迎擊斃賊數十人該逆敗竄四散十一日許忠標乘勝進攻直至武平城下令千總劉成章等圍攻西門許忠標親督各勇圍攻南門適廣東南雄協都司方耀管帶兵勇入閩會剿知縣八十四亦督帶兵團馳至四面環攻斃賊無數賊猶抵死抗拒我軍用火包火罐拋入城內

賊匪驚慌由東門逃竄復經官軍截殺斃賊二百餘名自相踐踏死者尤衆當將武平縣城收復現已飛飭許忠標跟蹤追剿以杜賊匪回竄曾玉明等約會張啟煊分路進攻先圖克復連城然後規取汀郡一面分飭延邵龍巖各文武激勵兵勇加意防守免致分竄蔓延臣慶端仍隨時察看情形如果連城未能速拔賊勢趨重

聞

延平卽親統兵勇馳赴延郡督勦務期廓清醜
類迅復各城至延郡巡防事宜已飭道員丁曰
健等督率官紳趕商布置均奏入報

初三日

庚寅

薛煥奏言據署提臣曾秉忠咨稱四

月初二至初八日乍浦之賊約有七八千人分
兩股而來一由獨山海塘一由全公亭皆係直

撲金山衛城之路副將滕嗣林等各帶五成隊
迎勦進倭賊巢施放噴筒火箭賊衆驚潰我軍
分路追擊斃匪甚多擊沈逆船十餘隻追過平
湖所屬之全公亭已無賊蹤始行收隊時有另
股賊匪突撲金山所屬之廊下鎮官軍先將水
路之賊擊退並分投進勦陸路賊匪擒斬甚多
賊竄呂港曾秉忠督飭水師開放槍礮並令陸

軍結陣迎敵奮勇環攻賊衆敗潰立將廊下鎮
賊卡埽除淨盡追至陳家塢地方大獲全勝其
時獨山至公亭等處之賊仍來撲犯又經滕嗣
林等迎勦鏖戰三日將賊擊散探知新倉鎮尙
有賊匪屯踞議卽乘勝進攻副將黃金友會同
滕嗣林等督帶兵勇馳抵該鎮賊衆衝出抵敵
官軍與練勇各當一面槍礮齊施旋合隊四面

兇抄擊斃逆匪無數併力窮追該匪紛紛棄械而逃退回乍浦其大渚塘一路逆匪初四至初九日四面竄撲不下萬餘人馬隊槍船絡繹而至並已偷搭浮橋渡過悍賊多名曾秉忠督飭水陸各軍四面兜剿先將浮橋拆毀仍督軍進攻擊斃騎賊五名內有逆首項天侯一名殺斃悍賊數百人轟沈賊船數十隻逆匪落水淹死

者無算我軍直追過河將該逆營卡全行踏毀
守備曾敏行等復帶礮船乘勝前進直抵新埭
鎮該逆驟出馬步各隊並集槍船百餘隻擁
抵禦我軍開礮轟擊又派五成隊登岸衝殺所
向披靡賊衆大敗竄回平湖查金山界連浙省
水陸處處可通該逆以撲犯大泖塘等處牽掣
洙涇之師以撲犯全公亭等處牽掣衛城之師

而另股竄踞廊下鎮窺伺浦東腹地且與嘉定
青浦之賊聲息相通曾秉忠及滕嗣林等將各
路賊匪併力痛擊金山境內肅清水陸將弁仍
各擇要扼紮以固內防惟平湖與金山犬牙相
錯朝發夕至該縣一日不復松江各屬一日不
安臣與曾秉忠往返函商擬卽乘賊新挫進兵
先攻平湖如能得手再圖乍浦一面咨催浙省

迅速派兵前來會合夾攻以冀克復堅城至水
陸各營將士一月以來每戰必捷力保完善尙
屬著有微勞可否准臣查覈歷次存記戰功擇
其尤爲出力者酌擬保奏出自

鴻慈各縣團練紳董協助官軍帶勇殺賊應請一併彙
獎奏入

上諭內閣曰逆匪由乍浦分股直撲江蘇金山衛城經

薛煥飭令滕嗣林等帶隊迎擊曾秉忠督飭水陸各軍四面兜剿將該逆營卡全行踏毀金山境內肅清勦辦尙屬得手著薛煥督飭帶兵各員乘勝進攻平湖並咨催浙江官兵會合夾攻迅圖克復所有出力員弁兵勇著薛煥查明彙入厯次存記案內擇尤保奏其團練紳董一併彙請獎勵

初五日

壬辰

慶端奏言汀州悍逆於三月二十二

日分股至鳴公腰意圖劫營副將林文察等嚴陣以待賊卽退回二十八日林文察督軍進攻姑田焚燬礮臺一座賊匪竄回連城將姑田鄉克復惟探報連城四堡一帶復添匪黨四五千並有大股於于家村等處搶船二三百號疊獲奸細供稱一股圖竄龍巖一股欲由清流甯化分擾延平邵武等語其前由武平竄出之賊併

八連城分股竄至上杭之葛樹下龍地方江西
又有股匪闖入武平界內且據浦城縣知縣陳
鳳音稟報安徽婺源之賊七八萬人竄擾常山
江山逼近浦城面面受敵防不勝防現在甯化
一路已令遊擊劉紹基帶兵馳赴清流由張啟
煊酌量調撥張啟煊復督軍進紮玉田以遏其
鋒龍巖一路添委副將惠壽等妥籌堵剿浦城

一路派守備盧成金等統帶兵勇馳赴仙霞嶺
一帶擇要扼防查汀州連城旣未克復武平上
杭均有賊蹤皖逆又緊逼浦城上游軍情萬分
危急而延平爲全省關鍵逆氛環逼尤應加意
嚴防臣親帶省標兵八百名於四月初六日由
省起程馳赴延平嚴督各路官軍分路進攻迅
圖克復汀州連城郡縣至省城爲根本重地臣

會商巡撫瑞璜將軍文清督飭官紳帶領兵勇分段晝夜盤查以昭嚴密

同日巴棟阿馮子材奏言逆匪圍撲鎮城後四月十三十四等日賊勢日增連日圍攻不輟槍礮齊施竟敢直薄城闕我軍嚴密守禦礮斃攻城賊匪無算賊見無隙可乘復遣逆賊三名赴營投誠圖爲內應臣等察其詭計當卽訊明確

情正法臣等以賊黨日增將揚防兵勇調回一

千三百名扼紮要隘並飭丹徒諫壁水營加意
防範又以該處緊要函囑黃彬酌量撥船助剿
現據水營遊擊林宜華等稟稱自十一至十八
日逆匪屢撲丹徒水營晝夜猛攻該遊擊等督
率兵勇登岸迎剿殺斃黃衣賊目一名拆毀賊
搭浮橋一座連獲勝仗殲匪甚多等語查鎮江

一城該逆注意已久此次水陸齊犯使我各不相顧冀逞其豕突之謀陸路防師原可啟關出戰無如逆勢彌張未可輕舉臣等惟有仍飭水陸各營竭力籌備以杜賊竄而固江防均奏入報

聞

初八日

乙未

都興阿奏言揚防一軍介在南北水

陸之中當湖西喫緊時飭都司馬步雲等礮划
嚴防高邵湖面並調遊擊石皓一軍駛入湖西
以遏東竄與總兵黃開榜水師互爲接應其陸
路高郵一帶奸匪潛跡居民搖惑則調遊擊常
勝領帶義勇馳赴高郵城外助剿四月初一至
十三等日王萬清會同水師渡湖進剿連敗賊
於僧道橋等處賊壘悉平儀徵之賊經總兵詹

啟綸等分路攻剿連敗賊於金家大橋等處十八日賊匪麇至揚州西北鄉一帶後路馬步賊連互數十里意在撲取瓜揚設有疏虞則前路鎮江及後路裏下河數州縣勢如破竹實爲江北全局所關臣於十八日親帶遊擊刁經明協領杜嘎爾馬隊一起共二百餘騎向城西北一路察探遙見賊旗分布列隊前進約有萬人當

令杜噶爾督飭馬隊迎頭衝擊營總其爾廣額
帶親兵馬隊由南路抄擊臣與刁經明督小隊
在後接應一齊進攻賊匪猝不及防紛紛敗退
惟賊數甚衆其後路大股仍連營築壘官軍奮
勇衝殺槍箭齊施斃賊二三百名生擒二十七
名二十一日復傳集各營會商定計分路齊進
賊匪傾巢而出并死抵禦我軍馬隊衝擊賊勢

稍卻刁經明等由中路直擣賊匪大隊左衝右
突殺斃悍賊甚多杜嘎爾率領馬隊陷陣衝擊
殺斃黃衣賊目數人該逆始紛紛潰退我兵馬
步齊進分投追殺屍橫遍野投赴溝塘溺斃者
無數守壘賊目均燒斃無遺馬隊追殺三十餘
里詹啟綸等復將甘泉山等處賊壘三十餘座
悉行踏毀生擒七百餘名斬馘約數千名刻下

郡城安堵惟天六踞逆患在肘腋續探賊首僞
英王帶領馬步賊黨四五百人由九洑洲過江
已抵六合難保不勾結黨與復覬揚州臣仍分
飭各路嚴爲之備此次賊氛內犯臣深慮兵力
太單請援莫及大局危在呼吸幸將士效命力
挫兇鋒轉危爲安所有身先士卒異常奮勇各
員相應開列奏懇

恩施以昭激勸其餘在事出力文武員弁可否容臣擇
尤保奏之處出自

鴻慈奏入

上諭內閣曰此次大股逆匪攻撲揚州經該將軍分路
布置竟能以少勝衆大挫兇鋒辦理甚爲得手其尤
爲出力之總兵詹啟綸著賞加提督銜協領杜嘎爾
著以副都統記名簡放先換頂戴遊擊刁經明著賞

給畢什固圖巴圖魯名號參將王希堂著賞加副將
銜遊擊李曙堂著以參將儘先補用並賞加副將銜
千總胡世英著免升守備以都司儘先補用並賞加
遊擊銜賞換花翎其餘在事出力文武員弁著准其
擇尤保奏候朕施恩

初十日 丁酉 巴棟阿馮子材奏言該逆此次撲犯

鎮城糾衆數萬分水陸進攻兇悍之鋒誠不易

挫臣等親督在防將士登陴固守署常鎮道江
清驥署丹徒縣知縣田祚實力巡防編立門牌
使奸宄無從溷跡該逆未遂狡謀攜糧已匱於
四月二十四日乘雨遁逸留精銳爲之斷後臣
等卽派總兵富陞等帶領馬隊跟蹤追剿斃賊
多名正鑒戰閒四明山後伏賊突出橫衝阻我
追師已革總兵蕭知音等督飭兵勇奮力攻剿

前後夾擊遊擊關松志怒馬陷陣立刺黃衣賊
目二名參將田慶和直搗中堅連殪數賊生擒
執旗悍賊一名兵勇奮勇直前槍礮齊施斃賊
無算逆勢不支奪路狂奔官軍沿途追殺將逆
壘一律蕩平始收隊回防是晚探得該逆尙踞
鹽街一帶二十五日總兵朱承先等分路進剿
該逆四出抗拒官軍迎頭掩殺斃賊不少逆勢

披靡正追勦閒鹽街後面紅山凹各出大股馬
步逆匪分兩路包抄都司劉春賢等撲入賊隊
手刃數賊把總黃裕進外委邱大洪均受槍傷
力竭陣亡適總兵朱承先等同時趕到合力殲
勦斃賊極多該逆敗遁官軍追殺數十里共計
先後斃賊七百餘名生擒長髮悍賊七十餘名
訊明正法落水淹死者無數其丹徒諫壁一路

四月十九至二十一二等日時有逆匪竄及丹徒鎮等處均經官軍擊退二十四日該逆竄擾劉家村遊擊林宜華等督率弁勇登岸勦捕外委張德興衝入賊陣矛刺執旗賊一名賊衆西遁至金山一帶四月二十二日大股逆匪竄至四擺渡五擺渡河口搭造浮橋肆意焚擄經副將李逢春等帶長龍礮船趕往轟擊斃賊多名

該逆悉行竄逸李逢春等登岸追勦將賊搭浮
橋拆毀整隊而還此次陣亡把總黃裕進外委
邱大洪臨陣捐軀深堪憫惻合無仰懇

天恩飭部從優議卹奏入

上諭內閣曰逆匪撲犯鎮城經巴棟阿等登陴固守編
立門牌使奸宄無從潛跡該逆計窮力竭乘雨逃遁
巴棟阿派總兵富陞等帶領馬隊跟蹤追勦將逆壘

一律掃蕩先後斃賊七百餘名其丹徒鎮劉家村等處竄匪均經防兵擊退辦理尙爲得手仍著巴棟阿等督飭將士嚴爲防範該匪儘敢回竄卽行痛加剿洗陣亡把總黃裕進外委邱大洪均著交部從優議卹

同日楊載福奏言首逆陳玉城率大股悍賊來援安慶闖入集賢關三月二十日於菱湖北岸

修築營壘城內之賊出隊接應菱湖南岸並有
船隻往來仍分股散踞關外以阻官兵二十二
日賊正在湖中接渡臣派參將蔡國祥率領礮
船追擊該逆齊放槍礮抵禦蔡國祥進攻益力
奪獲賊船十餘隻二十五日守備郭明鼐率親
兵前營礮船搜巡內湖奸細行至呂家橋見該
逆撐駕竹木簞數十架郭明鼐揮令各船開礮

衝擊該逆抵敵不住紛紛棄箠登岸郭明鼐帶
隊疾追直攻山下賊卡賊勢不支棄卡逃竄我
軍收隊回船當將竹木等箠概行奪回二十六
日臣督帶參將周萬倬一軍親至湖東該逆先
於夜間築成半邊月牆一座尙未踞守臣當令
拆毀周萬倬並毀湖邊賊卡一所因會商統領
曾貞幹派勇在湖嘴趕築一壘以當其衝使該

逆不敢偏近水陸營盤正築壘閒賊衆蠢擁來
撲我軍一面抵敵一面築壘賊亦一面攻撲一
面添修礮臺並於菱湖兩岸加築多壘二十七
日派參將唐學發率水軍擡礮登岸周萬倬領
陸隊同入湖嘴新壘併力扼守該逆新添各壘
均密架槍礮阻我舟師進攻之路舟師出擊必
須衝過該逆兩岸礮臺傷亡弁勇頗多四月十

一日總兵鮑超成大吉兩軍會攻關外賊營臣帶同總兵王明山等四營三板並周萬倬陸隊前往助剿繞入石門湖登岸至赤岡嶺該處逆壘四座鮑超等軍勇敢爭先直撲在前三壘楊占鼇等會同周萬倬合擊在後一壘數次撲過賊濠搶拔木椿踴躍將登賊壘礮石如雨官軍傷亡過多未能得手查該逆首陳玉城全力援

皖勢在抵死爭抗賴鮑超等軍雲集關外自應設法攻取現飭楊占鼐等駐守石門湖就近協助臣仍往來照料不敢稍有疏忽

楊載福又奏言髮逆赴援安慶臣分派水師扼要嚴防駐紮舊縣之副將李朝斌等六營於二月初十日攻毀神塘河賊卡焚燬茯苓洲賊匪屯草數萬堆乘勢攻破白茅嘴賊壘並燒賊卡

二座三月初五日李朝斌丁泗濱二營擊賊於
荻港彭楚漢一營敗賊於魯港十三日李濟清
彭楚漢羅進賢等三營會合該處團練復擊魯
港內之賊拆斷馬埠浮橋踏平逆壘二座斃賊
不可數計生擒二十七名燒毀賊划三十餘號
副將何瑞祥率親兵左營於初十十四十七等
日擊敗股匪於無爲州屬之姚家溝等處均有

斬擒焚燬浮橋一座二十一日會合該處團練
擊破仁豐園之賊殲斃數十名生擒長髮老賊
十名正法攻破李壩橋賊卡一所參將陳代友
等率正左等營於二十三至二十五等日由練
潭進剿拆毀浮橋四座與多隆阿馬隊水陸夾
擊斃賊極多四月初六日賊衆千餘復竄練潭
我軍帶隊追剿殺斃賊目共天福一名餘賊百

聞

餘名查水師分防各路兵力甚屬不敷幸將士
均能用命無或疏虞臣仍隨時訓飭俾益加奮
勉以冀悉數殲除奏入均報

十一日

戊戌

掌山西道監察御史朱潮奏言近日

軍營相率偷安益成疲沓江南省郡遞陷克復
無期皖北諸營久已相持不戰浙江城邑連日

失陷東南爲悍賊必爭之地悍賊平則分股小
賊如埽落葉耳以兵單爲詞團練之勇果安在
以才乏爲詞投效之人不勝計以餉絀爲詞捐
輸之銀亦不少以待釁而動爲詞歲月之遷延
不爲不久今非特城池聽賊占踞也卽報小小
勝仗皖北江南近來亦未多見自來用兵未有
觀望稽遲如此之甚者也

皇上憂勤惕厲宵旰不遑竭天下之全力以養兵財窮
民困勢甚倒懸而軍營玩泄情形求爲

皇上分憂者不可多得視失地爲無關輕重視

寬典爲可以屢邀其相聚共議輒以難辦二字了之臣
以爲其不能辦賊也由於畏賊其畏賊也由於
不畏法畏法者謂死於法不如死於賊無倖生
之路則勇往直前不畏法者謂不死於賊未必

卽死於法有苟免之心則徘徊不進蓋軍律至
今日廢弛極矣嘉興府知府張玉藻以奉

旨正法之員脫逃不覺始於因循積爲膽玩軍威何由
而振逆賊何自而平相應請

旨申明軍律

嚴飭封疆大吏及統兵大員剋期滅賊前此之遲延
仁施格外後來之誤貽

國有常刑庶士氣可望奮興而軍務日有起色矣
奏八

上諭內閣曰用兵以來時逾十載耗竭帑項供應軍需
而逆賊未平且益延蔓總由地方大吏不知固結民
心統兵將帥擁兵觀望不以剿賊爲事如該御史失
潮所陳玩泄情形均屬切中時弊實堪痛恨朕兢兢
業業宵旰不遑豈忍士民久罹水火各路統兵大臣

及督撫等既已貽誤於前此後務當激發天良克振
軍威埽除賊匪儻再遷延貽誤致令賊匪攻陷城池
肆擾地方朕惟執法從事不能再邀寬典至軍營將
弁或帶兵勦賊或派往應援往往有心玩誤此等畏
葸無能之員卽應立予正法以儆其餘乃該統兵大
臣不過將該員等革職留營希圖開脫並不從嚴叅
辦以致紛紛效尤軍令何由而肅嗣後若敢徇情寬

好不行據實嚴劾一經查出定將該大臣等一併治罪其失守地方人員如已革浙江嘉興府知府張玉藻久經奉旨正法乃瑞昌等以潛逃無蹤一奏了事雖經嚴行飭緝並未報獲尙復成何事體著瑞昌王有齡及各直省督撫仍遵前旨將張玉藻嚴拏務獲卽行就地正法毋任漏網並著各該督撫等督飭各該地方官於守衛事宜實力講求以期有備無患儻

賊至輒行避逃惟當按律定擬罪名以伸國法不得以革職隨營效力或隨同收復城池等詞奏請免罪經此次嚴諭後各路統兵大臣等如仍前玩泄不思振作則是自貽伊戚朕亦不能爲之曲宥也

十二日 己亥 薛煥奏言探報蘇州逆首陳坤書將

青浦逆黨調往撲犯鎮江 臣當咨巴棟阿瑪子

材嚴密堵禦曾秉忠遂督同參將李恆嵩乘機

攻取青浦於四月十九日親帶水師礮船由龍
王廟前進將石塘村僞館燒燬行至朱家角逆
匪設有兩卡守備曾敏行等先已會同李恆嵩
等將卡踏平守卡之賊四散二十日直抵青浦
曾秉忠督飭守備曾守忠等分攻東西南三門
曾秉忠誘賊出巢揮軍進擊敗賊三次賊卽回
城堅守不出其時嘉興嘉善援賊已由俞匯竄

近章練塘圖襲我軍之後李恆嵩卽回防松江
後路曾秉忠回軍迎擊章練塘之賊派守備曾
守忠等在元和縣界田灣等處疊斃逆匪多名
守備林隆祥等亦將潑山湖赴援青浦之賊船
擊沈數十隻焚燬百餘隻臣以我軍現攻青浦
札飭駐防寶山之參將姜德進攻嘉定以分賊
勢該參將卽日帶隊行抵盛家橋兩旁賊匪突

聞

出官軍短兵相接斬獲賊首一百餘級該逆敗竄當將賊巢踏毀我軍正在收隊該逆又復返追姜德轉隊接戰將賊衝斷又斃賊一百餘名現仍督飭各軍密籌勦辦以圖克復城池奏入報

十四日

丑

辛慶端奏言

臣

於四月十三日馳抵延

平府城據報姑田竄出之賊經叅革護理汀州
鎮總兵袁良會督官紳帶領兵練分三路迎剿
各開槍礮斃賊數十名餘逆逃回連城四月初
二日暫革道員張啟煊派隊由山下圩進攻逆
匪率衆抗拒我軍奮勇勦殺槍斃賊首二名賊
匪一百餘名踏毀賊營二座該逆退回上江坊
其金雞嶺一路副將林文察督率各軍連日攻

勦殺賊甚多初七夜出隊由亨子堡進並令遊
擊戴慶吳等帶領兵勇由草里嶺進俱在坡頭
設伏叅革代理汀州府知府程鐸等各帶聯甲
作爲引導前往攻勦該逆傾巢出拒城內又衝
出大股包圍勇目廖得金等且戰且走行抵坡
頭伏兵齊出該逆猝不及防自相踐踏死者不
計其數該逆退竄入城另股由南門突出我軍

分投迎勦總兵曾玉明大隊馳至前後夾攻復將火器拋入城內賊匪驚惶無措勇目賴得福等首先登城臺勇攀附而入殪執旗賊目六十餘名內外截殺逆屍枕藉賊開西門而逃我軍追殺十餘里斬馘甚多生擒三十二名訊明正法於初八日將連城克復另由北門逃出之賊復經張啟煊截殺無數先是江西另股逆匪於

三月二十日由長甯竄入武平偏近縣城經武平縣知縣陳汝枚督勇攻擊殺斃長髮逆匪數十名該逆由上杭界內竄逃並據知府曾憲德等探稱逆首彭大瞬在姑田槍傷左脅逃至連城於三月三十日因傷身死係逃出難民目擊各等語查逆首彭大瞬最爲狡悍久踞連城圖犯延郡茲在事文武奮勇力戰克復城池巨魁

授首軍務大有轉機惟汀州郡城尙爲賊踞亟
應乘此聲威趕緊攻取現飭曾玉明等剋日進
兵並分飭龍巖清流邵武各文武合力堵剿以
期早日廓清此次克復連城曾玉明調度有方
林文察等親冒矢石均屬戰功卓著先由 臣 存
記俟汀漳克復一併奏懇

恩施其餘出力文武員弁並傷亡兵勇容俟查明分別

另請獎卹奏入

上諭曰此次收復連城未爲大勝遇事則保乃近年來
外省惡習俟克復汀郡方准酌保以期覈實